

補

勤

詩

存

補勤詩存卷之十

山陰 陳錦 畫卿

東征磨盾集中

乙丑秋

恭謁曲阜至聖林廟詩呈曾滌生揆帥

是年八月揆帥視師濟州恭詣闕里叩謁林廟觀車服禮器命從官賦詩以上得二十章

尼山

在縣東南六十里五峯連峙山石作輪輞形可爲硯

諸馮與岐周亭壽皆千年將生大神聖乃有名山川嶷嶷明德里嶽嶽降麟天姑置崧高詩宜賡生民篇

防墓

防山在縣東二十里爲啟聖王墓

天子禘自出名山有祖峯哀哉五父衢哀然四尺封雨

中一掬土元氣所隱隆
先天地而生萬里崑崙龍

孔林

泰山殊未頽防山已蔚起
鬱哉楷樹林鱗遊鳳皇止草
木何馨香扶輿爲終始凜然斯文存祖龍愧欲死

孔廟

廟食豈聖心宮牆自在目
階前百世王庶下一嚙肉萬
木悄無聲叢碑大可讀旦夢與文琴精神洞於穆

杏壇

廟延正中
有杏壇亭

東周有寸土劫火不能磨
片席煖千古春風噓四科目
邊種嘉樹天上聞弦歌大聲起木鐸焉用龜山柯

檜樹

孔子手植自晉隋唐宋金元枯榮者三
火於明之宏治及國朝雍正二年者

再皆復生焉高六丈圍圓
三四尺在大成門東北

老樹三千年聖人手所植生意坼苞苴靈根鑄鐵石榮
枯關運會萌芽見氣力眼前弟子行漢松已百尺

故宅

在聖廟之東僅
存故宅門一楹

周鼎凡幾易素王宅猶存道高數仞牆身居環堵門窮
廬壽河嶽宗子家乾坤堂構七十傳邸里擬天閭

故井

在詩禮
堂後

一汲蒙泉水伏流洙泗交養賢悟義畫樂道分顏瓢古
蜚滄芳冽智欄生韻濤逢茲九軌原衍爲學海潮

泗水侯墓

伯魚子墓在孔
林前左十餘步

陋巷偏厚葬西河徒失明與齡遲一夢坐奠先兩楹泗

水藏珠穴尼山嘉樹城合祔法周公趨庭逮九京

沂水侯墓

子思子墓在孔林前十餘步

達人更有後遙遙詩禮傳十傳述宗聖七篇開鄒賢國

老起再世文孫加大年東山縣氏族永奠洙橋邊

洙水橋在

林門前爲洙水所經

魯壁

在詩禮堂後有碑

倒衣人未生尙書已在壁吾道會貞元斯文重胎息敗
堵抵堅城微吟成霹靂頽然此壁存穹碑與俱立

周尊

凡十曰木鼎曰亞尊曰犧尊曰伯彝曰冊曰匱曰蠡曰寶蓋曰夔鳳豆曰饗

餐廩曰四足爵皆周銅器模其足於一几合置之爲國朝仁廟所頒

敬器在周時已苦不可識豈圖百滄桑乃留十黼黻代

遷皇王家永祔聖人室古色何斑斕精光炫圭璧

楷亭

子貢手植在孔林東南榮枯者亦屢

木壽幾無算鼻祖乃靈楷銅筋抱鐵骨故本傳新葺立雪已千載循牆如有懷及門貢鄉樹四方在庭階

墓廬

子貢築室獨居三年處今在林西南

去矣失聲哭尼山空墓田此廬獨千古端木又三年巖碑塞劫土虛冢盤蒼煙大破阮儒膽經營氣數先

唐槐

在詩禮堂前者爲最枯而復榮

老物何偃蹇俯窺詩禮堂煙雲萬樹亞風雨一龍僵卧骨病禿癯空心抽巨秧時巡題御製親見開元皇

宋杏

銀杏大小十餘本在詩禮堂唐槐之西

宋儒故林立
宋樹無慙姿
英英入殿廡
郁郁升庭墀
生
意起垂絕遠
條發大枝
杏壇餘蔭長
視此堂西陲

奎文閣

廟中最高處相傳可見東海云

大文垂宇宙
名山河所藏
一覽小齊魯
九天聞龍鳳
海上樹如薺
空中書自香
登臨歎觀止
萬仞四圍牆

詩禮堂

在廟東與金絲堂對峙中有御座

世儒廢萬卷
聖胄聞二經
一立詒謀足
再趨庭樹青
振
古梁木在到
今絲竹聽卽
此是冒堂顏
以兩字銘

靈著

一本五十莖中空外成方棧者貴在孔子內林

在天還學易
示人掛劫靈
回思無過年
五十以學易舊註五十不作卒

解

厥生大衍莖
蒼蒼舜野梧
拂拂堯階蓂
焮蒿有餘愴

揅指生芳馨

異卉

二種一枝葉似桃上曲枝端結實如蘭出飛蟲繭端三葉一似柳而葉端圓厚

枝綴繁實而藍如梧子大均不傳其名獨生孔林內牆

宰木視其人造物良不苟栖鳳無凡桐葬麟殊常藪矜奇苦帝心貢異費神手自生民以來此樹亦未有

歸自曲阜寄孔舫芝年丈昭燉

其兄昭然昭燉皆己卯孝廉

漢代松楸周鼎彝堂縣車服壁金絲曾經滄海意無水展謁東山歸有詩柱下難尋龍問禮梁間猶讓雉知時舉頭咄咄驚宰木世外攜來奇樹枝

過顏廟

洙泗源流第一傳宮牆數仞擬文宣賢關主器聖猶子

道脈宗支天不年卓爾欲從一閒達庶乎足發四科先
尼山俎豆三千在元氣由來獨渾然

嶧山秦碑

摹刻在兗州府署

登秦望以望秦大籀捫讀止丁丁皇初老物孕巖腹編
之詩史吐幽馨閉門詠杜博一古秦碑有牡嶧山陁造
物善藏不至此安得風雨中完斷石青我來泰山數封
禪元公舊治驅車停先見擘窠大字六兗治有碑曰重禮教崇信義
言陳語故生倦形到門陡立斯相篆章句險奧文瓏玲
史皇造字試媧石點畫深入未煉星驚喜欲言忽憬悟
重摹不諱碑陰銘莫信中間字句缺大半初搨非黃庭
譬若羲爻河洛刷萬本誰復寶貴開天經出門搔首付

一笑早知老石飛去還蒼冥正惟是物失真種乃使蟲
肩負螟蛉迷天野火燒不盡孤嶂千年磨畫屏碑末載
杜詩孤
嶂素碑在之句因重摹之不知嶂山之
碑野火焚素木傳刻肥失真亦杜句也

八月三十日作

十里人煙土塹寬
枋聲如雨上城端
野塘多露蓼花淡
古院長晴蟲語乾
高閣獨當三面月
窄衾先漏五更寒
燈光向我倦欲滅
猛聽將軍蹴戰鞦

時大軍
夜發

森森河流逐浪風
三分秋色二分東
戍樓衣盡鄉愁重
獨寺香消佛力窮
都是菊花生太瘦
不妨楓葉老偏紅
好詩宛轉如嘉偶
枕畔依依到夢中

復初大師以松相國

筠

大書墨蹟見貽詩以報

之

明月無人管太白唐時樓清風破戶入老僧面壁愁

神仙厭作詩再生北平李

申甫
鯁使

道逢潘大臨琴軒風雨

重陽裏

迺修翰墨林迺釀犒師金古聖光新髯秋城生晝陰

一登蟾桂吐再登鴉葉飛松風健談柄絮雲飽戎衣

便沽蔬盍酒大喚蒙山茶雁刷平沙雨馬嘶高樹霞

醉倒先生前蒼然見暮色上樓讀叢碑下樓扶破衲

緩轡歸清罄狂吟驚戒壇老僧遮道言無詩歸去難

貽以雪淡詩報我斗大字補壁動秋燈精神滿枯寺

述夢詩

一握秋風指爪寒月團團裏畫闌千南雲那不歇歸夢
祇是歸時別更難

故園秋草散流螢猶道銀燈舊日青飛燕新巢渾不定
樓臺多管未曾經

再覓封侯事便慳成行兒女拭嚔鬟愁雲繭繭當空織
一卷新詩重似山

四壁蟲聲露滿天酣眠拌讓別人先無愁祇當神倦醉
卻到醒時一惘然

寄釀雲姪睢甯幕中

手植芝蘭記滿階眼前束髮半天涯阿咸尙憶當年事
曾共滄桑幾度來

艱難多值爾生初纔得相依又別予不願汝曹偏效我
祇應尋味伏波書

衝喉白刃溯烽煙莫負空空再造天

辛酉之難姪被賊擄頸受刀幾斷不死

死存得此身離亂後可堪還有買山錢

膩人花雨不如秋且作紅塵黯淡遊報汝慰懷無別事

題詩三上酒僊樓

謂太白樓

金口埧

爲泗水所經橋一而間四

黃河北徙兗土平泗河獨抱金天城長虹墮地石千丈
四斷不礙神龍行羣龍垂頭自奔赴腥涎似雪吐當路
上流明淨揩玻璃下流陡絕成瀑布空中一束變驚濤
鯨魚倒退飛禽號風雲對此駭欲走日光碎作金銀毫

高春直下底疑洞翻然作勢復全涌大氣不容人俯窺
挾之俱去有餘勇半邊突受罡風吹側勢能令平地危
森森性成忽暴怒不平如此誰爲爲推車過之意殊慄
左水清夷右壁立此身兀似行巖腰按轡徐徐馬步仄

大風行

天公例有新寒報夜半登高吹萬竅零星太苦吟蟲叫
呵成一氣秋聲到帝居乾方渙大號不期妥帖期排冪
大意先催林木燥便縱餘涼拂堂奧包羅眾響成奇鬧
乍然觸處皆風料拔木壞垣掀客櫂斗大乾坤供一掃
要對歐陽彈故調錚鏦金鐵音猶肖澎湃鏗鞳善批導
動搖石鐘中竅要怒潮猝發千軍譟胥靈上赴湘羅弔

飛沙潑面驅邊徼蘇卿夜起冰天塞蓬蓬來去搜四陬
垂天之雲若飛鷁雷霆忘言霜雪笑虎龍無地容吟嘯
兩間嚴氣方大噪萬籟噫噎靡所告飛鳶前驅揚神靈
胡勿以此灰羣盜尋常小寄東籬傲菊花在前勿吹帽

曾廟

在嘉祥縣城

有數宮牆冠辟廡尼山嘉氣現支峯四科以外賢誰大
一貫攸歸聖是宗擔荷薪傳資魯鈍循環家學授中庸
微言不賴斯人在鄉嶧儒生失景從

師行嘉鉅道中

百里平沙雁戶空村民蟻聚大圩中風吹鹵地雪花白
露積梁園霜粒紅載道千戈愁汗馬頻年烽火逐哀鴻

長官禦寇操何術堅壁成城眾志同

駐龍垆集

鉅野西

重濠疊塹土城寬力扼衝衢破卯完十室有才支獨壘
萬家多黍聚空團秋深賊騎尋歸路亂後人心識長官
此外炊煙都寂寞侵晨驅馬壘雲寒

城武懷古

南武城看古邑存諸賢芳躅比閭尊無傷薪木曾居近
一笑弦歌偃室溫矛入齊師懷冉垆冉子遺蹟壁投蛟窟畏
澹村滅明故里可堪百代滄桑後十里蒼煙隻戍屯

單父阻雨

地鄰徐豫寇方深脣齒難依有戒心舊泊無人懷振鐸

單邑今屬曹郡卽
古曹叔遺封也
嚴疆有宰敢鳴琴大東門戶臨天塹
乾黃河繞其西
南巨壑千丈
百戰山河接碭陰南去江淮應咫尺
載途風雨苦蕭森

曉行豐縣

露溼氈衣夜氣羶童童初日冒寒煙
遠看隻雁入雲際
時有荒雞號樹巔
漢代家山千古王
江南風雨一城偏
帝鄉壯士成何事
釀酒登臺空惘然

豐縣雨中聞賊踞湖園

三間茅屋雨模糊
徹夜傳聞干振呼
浪拍湖園在南陽
湖西岸棚
民所居
飢戰馬風翻河套
河水漫入平
地稱河套
飽城狐東來
氣鬱蓬壺紫
西向雲生芒碭巖
大壘如山人迹少荒莊

驚起幕梁鳥

寄芹香五弟邳州

萬里吟詩北海行不嫌失馬又談兵東山苦雨零紅葉

重入江南第一程

時次豐縣

風雨重陽賦出車催租鄉里夢何如故人厚祿多離別

賴有令原一紙書

幾回車乘過翹翹舊夢紅塵逐浪漂爲我重尋黃石履

神仙名將有遺橋

往歲過下邳曾見
圯上納履處有碑

寄賈琴巖比部同年樹誠

自返高車過海濱

癸亥夏間曾
相逢海上

滄桑重見折腰身清風

未必慚同學厚祿何嘗無故人五斗名場還下第一妝

時世便長顰粗官換得詩千首賴有罡風撇輓塵

莽莽蟲沙又著鞭疏才容易受人憐鶯花夢歇江南雨

書劍寒衝嶽頂煙失馬忘憂天不信因人成事命無權

鱸堂傾蓋來何暮訪舊偏慳覲面緣

賈方掌教汶上予至汶而賈已行

杯酒長安語乍停河梁揮手感晨星天涯作客懷知己

馬上論交愧識丁不耐一官添礪硯獨蓬雙鬢渡滄溟

苦吟聲裏攙刁斗驚起寒鴉夜半聽

蠻箋十幅寄京華舊夢輪君掇榜花清俸有餘供菽水

簡書無事課蘭芽治安早已儲三策著述今知富一家

天末秋風思白也停雲千里雁行斜

十月三日潘琴軒廉訪率部將唐宏成潘鼎立

吳從發夏金標等將步卒二千破賊數萬於豐

縣城南次日潘季樓觀察鼎琛再戰竄賊於豐

北大敗之軍次作詩紀其事

力搏負嵎虎壯士登山奪門戶仰射驚飛禽弋人抱騎

投深林

粵匪善守利攻堅擒匪善走利掩捕戰法不同故云

兵不在多將在老老

將臨敵觀幾沈中原狂寇號健走長蛇見尾不見首千

軍躡後勞窮追十年未蕩荏苒數天心厭亂賊不知豺

狼夜喉齧熊彫

帝咨皋夔泄彭城毋俾有苗常蠶茲

蠶茲醜類走相告曰丞相度至於師愬武允通皆勁旅

大張四翼以角之賈魯河邊動秋色西軍毆賊東來急

天策焯焯十月交東師抱火巡三郊先疆曹田導荷澤

河流如帶天塹高無家奔虜蒙霧露亂拍湖園雨不渡
徐方震驚如雷霆八千戰馬羣兇怖歸趨芒碭路陂陀
假道豐蕭衝網羅將軍下令改南轅銜枚夜涉乾黃河
豐城蕩蕩寇欲上重圍立解雙珣戈陷陣前驅將百騎
鼠輩倉皇不得避十里五里遙相環寸人尺馬望如蟻
須臾豕突來眼前將軍指畫揮長鞭顧謂左右嚴儼待
密排後伍疏先偏碁布星羅故不發緩轡獨出與盤旋
要使三軍怒髮指龍媒蹀躞垂腥涎屹然山立誓勿動
再三挑賊賊蜂擁四圍麋鹿興箭鏃短兵相接不旋踵
將軍振臂始一麾火丸齊脫鳴春雷後車載礮轟天發
彈大如瓜落地開腥風血雨一時熱旌旗亂颭焦蛾灰

空拳肉搏踣困獸冲烽悍賊殊死鬪倒戟深探猛虎喉
奪刀飛截驚蛇脰月黑松林巨蟒收漲天毒燄風颼颼
蟲沙枕藉不知數但記斬獲千刀矛歸來遙指城頭火
繞城歡躍人聲稠夜見櫓槍亭西北鹿斯內走伎伎足
敗鱗殘甲抱驚魂滿路奔蹶帶飛鏃中途尙有生力軍
官放鞬鷹歸惡木再發再殪三縱擒兩軍笑語聲悃悃
乃命大旋飽牛酒妖氛自此無東侵投戈下馬作露布
第一南師開武庫以步勝騎少勝多播之諸軍喜且妒
凱歌聲裏秋風乾雨河戰士鞞鼓謹

贈江紹班少尹鑑超

夜光如豆一珠遺口不談兵抱負奇雷雨行天龍獨臥

江湖多歲鶴偏飢賢居下位空腸熱老遇知音已數奇
卻恨拳跼慣蹢齧十年猶未受人羈

骯髒難辭蝨處禪天教青眼覓王孫筆端未冷吟詩夢
指上猶存學劍痕臙仕晚人求瑣瑣粗官無地試溫溫
勸君拂拭千金璞長價重登薛卞門

夜眠不寐

寒動清笳月五更枕坳歸夢不分明犬驚人語咭咭走
鼠負蟲書察察行蠟炬有心灰尚熱風櫺多隙紙長鳴
思鄉只道江南遠但記來時萬里程

謂渡海北行

十月十七日爲亡室綠雲女史五十誕辰得家

書有感

時女史下世已十八年矣

一感琴絃已杳然忽稱觥酒酌重泉五年強仕人間愧
時予年四十五半百衰齡地下先畫裏愁痕扶弱質壺中長
日老吟僊早知此去還添算少忍須臾卽眼前
何事季隗先就木祇因高適早爲詩幾回死後逢生日
猶是芳年乍艾時一翼未能酬舉案九京爭共盼含飴
可堪兒女思追慶灑淚荒郊祝嘏遲

詠雁

冒隨春水逐鷗鳬叫破天邊旅夢孤捧日多情甘作客
遇風有力借銜蘆每因入鴈鳴難住不爲驚寒字便無
千里音書何處寄南雲迢遞隔江湖

初雪

匝匝彤雲野色皴朔風加意喚霜晨無聲已點山頭雪
作勢將回嶺上春半夜圍鑪思越釀幾家添綫話行人
時將長至高樓百尺寒如許尙有牀檠燈火親

軍次消寒八詠

雪

鑊冰屑玉費量裁一片光明絕點埃冷雨無聲堆瓦屋
北風有影疊瑤臺人間飛到雲猶凍天上寒時花正開
畢竟恩膏能潤物峨嵋春水隔年來

冰

土膏含潤亘重陰磊落江湖蘊結深銀海寒多風有骨
玉壺清極水無心觚棱不讓千潭月涓滴猶成百鍊金

莫怪狐疑還竊聽就中時有雪龍吟

炭

無端炙手使人驚火候純青待品評赤膽有時能屈鐵
熱腸何處不調羹圍鑪也熱溫存味伏爨猶吟膈膊聲
記得焦桐燒不盡參天喬木是前生

煤

獨降冰雪照人溫爨下潛消塗炭魂一代開山扶火德
萬家煮石動春痕重然劫土生奇暖親炙洪鑪了鈍根
要使九州同解凍斗量車載近天閭

繇

輕縐似雪被人深繞指銀絲輒不禁何處兜羅非佛手

本來黃襖是天心
千蠶餘緒連雲衲
萬繭同功疊繡衾
記取蟬聯瓜瓞夢
紅閨容汝度金鍼

絮

天然杼鄂吐茗華
木德含溫被萬家
十指秋風鳴絡緯
一肩春雪滾琵琶
相逢冷暖蘆花泣
肯逐漂零柳絮斜
匱匣行雲披嶺帽
洛陽無事大裘加

茶

一串新茶破餅圓
甌筌寒竈雪鑪邊
忽拋天上小團月
不落人間第二泉
肺熱澆殘詩裏癖
腋風吹老飲中僊
評論火候關涵養
空費千人試院煎

酒

蟻綠鵝黃幾品評持螯殊未了平生欲邀明月扶詩臍
仍讓才人奪飲名厭亂有心天不醉合歡無量聖之清
祇應凱宴黃龍府飽聽全軍搥戰聲

軍次消寒續詠

火硯

一番薰炙熨吟魂呵指頻將老硯捫起草燈前催火速
生花筆底夢溫存濡毫未冷煙雲汁著紙都消冰炭痕
片石如珪焚不得圍鑪相對近黃昏

風燈

開編相照勝螢囊炯炯星精象戴筐動壁寂無風影弄
隔簾明與月輪當匣中劍氣銜秋水領下珠胎惜夜光

秉燭遊時攜不去虛心常對字千行

雪帳

列戟森森夜氣迺雪花如掌羃羃韋韞節旄影落存蘇武
鐵騎羣空下蔡州十幅風翻油壁健一尖雲倚玉山留
將軍此日頒羔酒始信人間有大裘

霜筇

誰令筇語帶霜鳴自古惟聞塞上行寒動旌旄催曉仗
冷吹木葉下邊城戍樓月落幾人影茅店雞鳴何處聲
底事朔風慣相喚疏籬簷簷有同情

皮鞞

駝足難禁夜解弢烏皮鞞樣製添毫履冰敢信春無腳

出塞休嫌地不毛
蹠躩球場寒滾雪
蒙茸鞵綫暖藏刀
卷韞跼鐙歸何處
毳幕燈紅錦褥高

氈笠

絮帽皮冠兩不勞
寒氈片笠影周遭
寫天無縫雲成繭
釣雪垂頭鬢有毛
繞指餘羶溫鎧冑
等身涼暈壓銀袍
兜鍪隊裏擎青蓋
坐對金貂氣自豪

熏鑪

寒辟芸窗傲化工
細然蘭麝篆簾櫳
襴衫襪被吹噓暖
翠袖銀燈徙倚紅
睡後心腸空夜熱
書邊頭腦熟冬烘
幾人上直分獅炭
香熨貂裘待漏終

暖盃

圍鑪小宴雪初融
盤底春生製作工
最喜夜闌羹自熟
卻因人熱酒微紅
冰甌水瀾防茶老
銅銚聲麤忌火攻
斟酌溫涼思玉手
燈光杯語昵熏籠

雪後過太白樓

憑臨百尺暮城幽
未許人間擁火遊
一水暗流冰在腹
萬山沈睡雪當頭
瓦溝雲重銀鱗沒
檐鐸風暗玉筍留
聽得神僊歌水調
不勝寒處有瓊樓

梅魂

有花無花
之間爲魂

疏籬宜笑尙含葩
修竹無言著意斜
林下儻來今夜月
枝頭曾落去年花
寒燈紙帳師雄夢
流水孤山倩女家
一半句留難熨貼
昵人扶影上窗紗

縞衣微步可能支楚楚纖痕欲活時萼綠華來人有影
杜蘭香去我偏疑僊禽一喚雲初醒玉骨微溫雪乍離
呼得梨花眠不穩林逋先作大招辭

竹韻

有聲無聲
之間爲韻

新筠微綠抱芳姿折節相逢是我師篩出薰風聞處遠
擱殘清露下來遲書成千个字無俗斜好一枝花有詩
玉版搖搖渾不定秋聲聽到夜涼時

幽篁雪靜碧天沈不數龍孫解籜吟嫋嫋湘雲愁楚瑟
娟娟巖翠滴嵇琴小欄花午招竿影深院人來逗足音
千古風流今不斷留青常在七賢林

蘭心

就蘭之性
情爲言

補勤詩存卷之十

夫

悄立庭階玉樹行年年一瓣祝幽香善人有室春常在
處女無家情信芳流水因緣憐絮果秋風辛苦惜蓮房
莫須采入靈均手已覺湘沅澤國涼

纖纖弱箭濛珠塵本是空山獨秀身慧質自紉香草夢
素馨先得嶺梅春倚琴欲語思招隱抱石無言有媚人
世上與誰同臭味由來多節比松筠

松籟

無風而有聲曰籟

採藥靈巖雨乍晴干尋喬木籟初生豈因茶熟聞濤語
便是風來亦樹聲有意欲呼明月上無心時喚白雲行
童童青蓋秋難到何與人間落葉鳴

自然清響下高岑祇在山中何處尋一鶴雲間猶未叫

老龍天上本長吟，淩寒獨闌風泉竅。人定能知鐘磬心，
謾謾花飛聽不了。石牀況有客眠琴。

霧松

水氣緣樹間凝寒，消不得化作蓬鬆花。蔚爲雪霜色，細
熨槎枿痕。輕盈極鏤刻，白晝霏晨光。萬籟絕吹息，凍雲
漏斜曦。微風向空織。

補勤詩存卷之十

補勤詩存卷之十一

山陰 陳錦 畫卿

東征磨盾集下

乙丑丙寅

姊歸行

姊出單太恭人先予生十二年讀書有識長適姜輯
之同年偕之汴以道光庚戌八月十四日卒于陳州
歸隲故里敢龍珠莊予曾作哭姊詩誌痛越十有四
年稿未定心常耿耿今改作之蓋仿屠後園師娟風
軒遺集中姊歸行詩體云

行行龍珠滑鬱鬱生之移索索古冢堆寂寂姊歸來姊
歸自何來黃河天之涯黃河去不回痛姊生別離莫痛

生別離痛無生歸期我生遲十年

我生之歲道光紀元姊年十有三

襁

祿向姊噓姊髮已覆額對我吟聲咿姊命良不辰蚤爲

失母兒失母旋得母投懷適所栖

姊周歲喪母曹太夫人撫之如所生

哀

哀慈竹心抱此離根枝十二理鍼綫十三自作鞵十五

著布裙十六雙蛾睂宛宛雙蛾睂漸漸房中帷瘦骨稱

羅紈但恐隨風散姊長弟猶弱母命從弟嬉牽弟繞廊

走兩足爲之胝弟病阿母泣姊來調養著弟勞姊先覺

弟怒姊怕怕姊教嚴如師姊言甘如醅可憐夏楚恩惟

有天心知胡爲分弟過仰體慈親慈親憂育子難姊憂

得弟遲含笑言親前毋憂得弟遲小弟新髻髮

予弟治卿少予

年三大弟髮垂筭早晚扶弟來聽弟初讀詩弟詩讀昔昔

姊詩讀折折睨視袖中書銀燈與之低

姊目短視

挑燈問疑

字背燈鳴鴛機鴛機易成幅鳳皇有時飛嗟哉雁行雌

化作門上楣

姊以己丑冬適姜

阿母持踵泣阿姊雙淚垂牽衣

送姊行下堂聞姊歸歸來坐繡闥夫聲還相隨羣言新

婦賢能作羹湯炊燕子常如客東風去來吹未嫁孝父

母已嫁孝不衰阿母患沈疴臂肉仰天封長跪守藥鑪

鬢髮燎爲灰

辛卯夏曹太夫人病危旅愈

送弟唐昌行別母城西陲

老父官深山舉家登崔嵬崔嵬復崔嵬肝腸一時摧

丙申

先大夫爲昌化校官冬月挈眷之任

生小苦識字微聞夫聲才夫聲能文

章十下秋風聞錦機伴寒氈換得兩鬢縷硯田多惡歲

種豆落爲萁誰識蓮心苦况生蓮子稀倒盡嫁時箱結

作小姑襦

姊方爲姜氏妹治裝嫁於李

小姑行且歸尙有機中絺織

絺不盈匹日午聞晨飢

姊夫姜輯之久困鄉闈舌耕不給姊善女工以繡自食旋舉

一子

予歸屢見姊言笑殊坦夷看弟逐名場羣從相挈

提但願弟卓犖母爲姊淒其巾幘思科名安貧固所宜

年年佐夜讀今年縫征衣征衣寄何方遠在大梁西

寅王

癸卯間姊夫遊幕至汴姊未與偕

大梁山嵯峨其水洛與伊蛾子胡不

飛春蠶尙有絲蠶絲吐欲盡蛾子當飛時忽思中州行

行與父母辭

戊申姊將有汴行先至昌化歸甯

迢迢桐廬江

自越至昌化所經

一葦以杭之萬仞唐山雲

昌化治前山

款款荆柴扉入門驚

白髮登堂訴離仇喚弟弟有婦膝下雙觴觴乍見疑夢

中淚落紅漣漣二老笑相迎手足親扶持何圖十年別

會面乃今茲飲以家釀酒飯以苜蓿糜核以園桃脯肴
以野鹿麝老人喜不寐夜話見朝曦舉頭望明月明月
圓如珪舉手攀柳條柳條繫斜暉柳條條已綠行人倏
已催登堂白父母父母忍勿悲慈姑憂邁年家室困孤
危故鄉苟可居肯與征夫偕聲無囊中金女無綳中孩
願擇側生荔結果枝纍纍願折木樨花木樨花之魁暫
爲一年別預約明年回語罷泣嗚咽涕出不可揮阿母
送女行攜手下堂階阿爺送女行停車在路達杜鵑離
花枝烏鳥見之哀已酉四月赴汴有期
姊始自昌化歸越獨行一萬里萬
里行蕨蕤姊出山之麓弟沿江之麋相左不相值時予
方自
越之署與姊舟相
左於餘杭道中耶谿空溯洄暮歸耶谿月朝辭姑嫜

幃姑嫜病龍鍾惜別心如剜舟行布帆雨布帆雨霏霏

車行大風掀大風使人噫少小嫁比鄰安知有輪蹄爲

誰賦行役一月行逶迤喜鵲報檐前夫聲迎驂駢相見

驚遠道慰藉生歔歔旅燕定新巢風雨爭芳菲

己酉六月姊至

梁皎皎蟾宮月青雲垂作梯問問夫聲名淡墨加標題

喜色上眉端賀客來駸駸可憐榜上花廿載寒窗難得

之良不難回首令人悽

時姊夫改名之煊中己酉河南鄉舉

客從南方來

父母一書貽聲吹北風填弟吹南風簾聯鑣同上京格

格公車推送聲長安道寄弟故土儀約弟整歸裝相逢

路之歧

庚戌計偕京邸晤姜始知姊在陳州約試畢往見未果

不逢路之歧乃逢

天之憐芳樹當春凋紅蘭倅以萎

姊以庚戌秋卒于陳州

疑是平

安書讀竟增嗟嘆上言道路疲下言寒暑違礪硯填胸

中憂勞積成肝雖則積成肝他鄉苦無醫將毋病聰明

疾不在容肌春暉能有幾小草先棄遺婺光沈中宵小

星失所維姊至汴爲姊夫置道者二滿篋新裘裳一棺不可攜衣香

渺胡蝶停首斑狐狸縱然死異鄉猶得傍琴徽了此聚

散痕魂魄長相依魂魄不可知故山伊可思何堪化石

身常爲未揜齒夫聲營奠齋請駕雲中嶠白鶴導其前

鶴羽何離襪榻樹杭旅櫬輦車挽紼羅關山黑如漆斷

冰流寒漸來從去時路秋風捲靈旗鄉樹慘無色望見

南城陴長至日南中得耗臥龍尙有珠乃在鯉山隈姊

家祖兆存霜露埋蒿蕪飄飄千里歸到此安素輻瓦屋

三兩閒長松與天齊姑嫜哭失聲旁人紛涕洟去日享
祖饌來時陳牲犧人生一泡影危如朝露晞明明舊城
郭忽忽新櫟裡悔茲遠離別況在愁病姿多故當中年
骨肉見凶懼向爲破鏡愁謂予丁未悼亡事今爲斷雁嘶本是
同根花一枝化爲泥傷我手與足其痛在心脾喚姊千
百回輓姊千百詞死者甘消歇生者苦歎咨歎咨苦不
已空山嘯餓鴟

殘雪夜赴鐵塔寺復初招飲

霧淞飛飛撲馬頭圍鑪小宴傍緇流梅花燈火逢良夜
鶴夢琴書共一樓雅令似雲消蠟燭酒痕如雨熨貂裘
將軍忽發優婆願醉記名山是舊遊

座有唐雲臺潘豫軒兩軍門

遊戴莊李氏園林偕潘豫軒軍門黃鑄青吳伯
良兩茂才

一徑入蒼翠名園破寂寥池冰當午結巖雪待春消抱
柱枯藤健臨門獨樹搖主人長不在筇竹倚危橋
別墅樓臺古遊人劍佩攜山穿籬眼綠雲向石頭低蠟
屐膠寒砌朱輪碾凍泥梅花呼不醒兀自夢窗西
卻值騎驢客難爲訪戴舟酒杯三太白鶴夢幾揚州黃揚州
人也是園林勝都應指爪留夕陽無限意一路送驂騶

再與潘唐兩軍門飲鐵塔寺

五陵裘馬九華燈行炙飛觴虎氣騰函谷西來存健將
座中王鏡海副戎大江東去唱高僧復初善歌酒星夜朗神

偃在殺戒宏開我佛能似此寒宵拌一醉筍厨猶有肉
如陵

碧琉璃近玉樓臺劍佩重看雪裏梅馬上記曾同捲甲
花前那得不銜杯好籠佳句邀詩客漸許名山識戰才
百尺浮屠通紫府夜深時有大星來

寺爲忠親
王建祠處

和錢揆初四十自壽詩原韻

世事都教放眼看光陰彈指擲雙丸滄桑噩夢猶存我
科目家聲不耐官一顧能空文字敵百年肯受腐儒餐
書生殺賊甯非福草檄燈前興未闌

儘容虎帳獨談經迅掃機槍仗帝靈茂苑秋零紅葉路
惠泉春漫綠莎廳天邊不定銜泥燕海上難收逐浪萍

瘵倚戎裝遲應詔杖頭延佇乙藜青

曾爲中書舍人

揮手吳門夕照沈短衣長劍又行吟白雲親舍懷歸什

枯樹江南作賦心箸史萬言成倚馬羽書千里誠前禽

囊中斗大韓碑字磨盾來從白下尋

近著平吳紀事八卷

不須對鏡認華顛蹀躞紅塵尙盛年宮柳新煙暄舞綵

揆初以寒食生

庭花餘韻滴琴絃才名驟長登龍日清俸閒消

養鶴天歸夢與君爭放櫂鑑湖鄉樹也含妍

來詩約明春同吳門

以太白樓題壁詩寄揆初附呈一律

江南春信一書頒驛路梅花索和還曾向酒樓尋太白
便誇州宅寄香山關河隔夢雲無恙冰雪當頭石更頑
報道故人休攬鏡鏡中原有鬢毛斑

寄家弟越中並東妹婿錢穗生

祇爲關河雨雪霏明知江國稻梁饑還山且喜雲無恙
避繳終須雁獨飛驛路梅花香自遠池塘春草綠爭肥
洛陽親友應相憶換得滄桑猶未歸

女姚五行

姚花農爲浙江令以第五女蕊卿字孫孫天女未之
知越十年始覺之易服自誓一月而仰藥死時咸豐
辛酉六月二十一日也姚方與予同役甬上後爲予
兒婦翁益得其詳爲徵詩紀事補作女姚五行

古賢索索死名義後世乃或死於情天假柔姿抗勁節
屢與鬚眉爭舍生嬾星夜半自欲隕此意駸難苛女貞

牽牛獨宿隔秋水織女七襄弄杼聲天錢乍聘混沌初
銀河一渡猶未迎雨小朦朧阻千里稍長僅僅知姓名
母媒有命比鐵石一言九鼎天所盟何圖文鴛死中路
金閨深繡渾不驚未曾識面無魂夢孤月自向花前行
穉松委露埋秋草兔蘿嫋嫋空中縈怪底魚鴻久疏斷
恐非宦迹稽郵程稍稍何來隱諱詞父母愕顧神悽清
旁人慘沮露言色天驚石破聞雷霆銜碑語哽牽母衣
此事十年今分明女心匪石不可轉女生如寄一葉輕
未亡何必視人世竟死毋乃傷寢庭願對蒙泉誓井水
請易綺素屏瓊瑛臨風灑淚空一奠杜鵑羞詛悲不鳴
改妝相見共嗟詫梅邊一鶴披霜翎翻然破涕甘獨活

怡怡定省言笑平夜深時或彈偷淚強飯不得毀伶俜
父母盛年作朋壽成行兒女同稱觥酒闌人散忽背坐
私心慘不聽琵琶娛親事畢不可待先期薰沐勞經營
仰藥如飴悄暝默指痕點血通精誠以藥和指血故不救倩女無
家欲何往祥雲繭繭迎鸞笙一雙了髻鴛青鳥萬人在
下呼不磨雛鳳墮枝不飛去百羽含泥成芳塋生知大
義况識字士夫遜此傲骨撐亂後天心惜名檢閒氣乃
鍾玉樹鶯我遊甬上得聽睹萬花繚亂風日晶能以義
死關天籟二姚之後多女英海枯石爛天不改待磨千
劫留汗青

嘉平十二日小病口占

小病凌寒強自扶，繩牀聽雨一燈枯。
起居無賴呼僮僕，飲食親調問藥鑪。
瘡豈能乘傲骨愁吟爭，恐脆孱軀心肝卅載嘔難出。
唾作冰涎滿玉壺。時方夜吐

歲暮感懷卻寄南中諸弟

救時良策已無存，成敗徒將往事論。
空使性情乖宦迹，獨憑文字眷侯門。
星霜鬢髮燈前影，風雨衣裳海上痕。
一笑梅花顏色在，幾回冰雪總天恩。

紅塵容易負生平，借徑終南賃筆耕。
十上有書彈世事，一官如屐換才名。
誰當已亂關天定，拌得無家便獨行。
草草戎裝琴劍瘵，重經滄海請長纓。

聞故鄉弟子捷秋闈者七人，卻寄淮上章恕菴。

誌賀

廣樂鈞天舊夢除潯陽江上歌琵琶爭趨戎馬成朝市
已被雕蟲蝕歲華百尺梧桐方在櫟十年桃李忽開花
蟾宮消息來何暮月落清淮雁影斜

嘉平十有八日

河渠一夕齊解凍大地咸知明日春

明日立春

西嶺忽鬆殘

雪影南檐初散負暄人暗催楊柳眞消息先讓梅花獨
笑顰昨夜東風寒不住雨聲渾似滬江濱

小除夕作

竿丸容易擲流梭負負將如此腹何萬里遊無今日壯
一年詩抵半生多梅花殘臘消尊酒爆竹鄉音聽枕戈

屈指平蕪重立馬春泥含綠上弓韉

丙寅正月觀孔雀舞

丙寅

寶扇初開錦作圍畫屏三尺建修翰生來翠羽飄都護

孔雀一號
孔都護

爭其金貂珥大官被體多文聊自喜驚才絕

豔讓人看怪他慣聽弦歌舞孔氏家禽卽鳳鸞

雙石行

一爲李生平叔所
贈一得自軍中

東坡雪浪臥中山眾香圍繞青孱顏

庚戌在定州見東坡雪浪石於眾香

園

秦園美人倚修竹悄立無言削寒玉

壬子登惠山得見秦園美人石

吾鄉尤號奇石多神仙鑿爛柯山柯

柯山爲越人采石處老佛僵

死白雲洞

羊山石佛寺

獅子大吼銀濤渦

吼山

天目支峯更詭

怪繁星亂落蠶叢隘惡谿不受精衛填龍湫怒決山根

壞

於潛大溜溪水行大石中奇險獨絕幼時隨在唐昌屢經此道

廿年踏破千芒鞋眼

中礪礪無朋儕熊羆牛馬各有狀造物無復常形骸豈

乏雕剗恣奇豁巨耐千人不得拔祇許縮本工臨摹斲

小恐傷斧斤伐空勞結想種雲英嫩石乍如玉荀生仇

池盈尺安几上天根倒插靈芝莖燈前酒後瞪目視譬

看車輪縣蝨子放光便作千仞觀較勝臥遊捫故紙東

來望見嶽背高餘星擁扈煙臺潮

謂杭海過蓬萊日照山

羣峯偃

僂角距縮平地不敢生嵯嶢轉恨奇石此獨少坐使湖

灘病卑潦

濟兗近湖同隸山左而地勢獨下

卻遺老米袖中珍留爲小

李畫時稟相逢持贈上危樓掌上春雲楚楚浮咫尺移

來山不重片時風雨爲清秋細筋入骨肌理皴指痕冷

搗冰苔繡翦取南湖淺水來瓦盆俯仰生寒溜微嫌隋
直行徑孤酷肖窮巖僧面枯島佛吟詩本骨立對此益
復爭棱觚自來相石厭豐下足重根龐損風雅安得生
石如生雲擎天一柱支函夏不圖萬物偶以天羅浮近
在梅花邊玉山倒地無人識竅坎塗塞廉隅捫我見獨
憐此奇質俯拾同歸植雙壁天然邱壑關遭逢斗室煙
雲半離合前石上銳貌清臞後石下蹇形敷腴巖腰隙
地儻入畫定須點綴添蓬廬懸崖突出滴鍾乳洞壑容
舟幕花雨蒙茸細草抵長松崔嵬不戴泰山土願將身
介兩石閒左提右挈雙螺鬟靜觀疑與萬籟接久視但
覺他物頑頓使神隨亂石走屈指生平歷巖岫屐齒磨

平蜀道難鏡潭照出廬山
疲倦遊從此拂征衣看嶽歸
來便掩扉取出懷中一寸碧
故鄉重見琅琊飛故居在越城飛
來峯其上曰小琅琊相傳是山
從琅琊飛去按琅琊今沂州

觀我圖

攬鏡自作觀我圖令我顧影增感吁
四十五年視人世忽然返己尋眞吾
初生恍忽在襁褓造物授體爲丈夫
手足持行雜人事心氣漸逐形骸麤
貓頭春筍容易長指日突出庭牆隅
兒戲羞隨醜夷角應門儼與成童俱
前身本苦讀書少健忘隔世添模糊
運肘便書斗大字名場束髮爭操觚
乍向人前露岐嶷入聲偶從掌上離明珠
跬步還勞顧復心置之平地憂崎嶇
飢寒不假自調

護尺寸猶是親肌膚此時認得真面目何不圖畫留形
模丹青祇解狀花鳥反道混沌難臨摹笑言漸漸對妻
子靈根斲小事雕塗瞬息改顏逐名利紅塵堆面神髓
枯牡丹多費燕支買洗妝但恐顏色無打頭亦或遇冰
雪春風愁絕梅花臞萬里山河凋鬢影十重邱壑生髭
鬚文章幾度入渲染搨本早失黃庭初偏於此日傳色
相琴書點綴周四隅本非拳駟况驚老何勞善畫千金
駒向惟畫肉今畫骨骨力曷與凡馬殊登場驚見新傀
儡依樣非復前葫蘆比之生初爲不肖描頭抹角存頑
軀所幸妍媸易呈露片刻入定端跼跼世俗塵纓賴彈
拭醉容側弁資匡扶面前圖鏡使人恭譬受萬目瞻睹

拘安得此坐竟百年威儀定命成許謨神僊久視不飛
去回看元氣還苞苴返童依舊見赤子羽毛落盡變乳
鳥老至方言腰腳健短晷當午近西晡便是無風樹常
靜邇來也覺嘵吟孤况復自作阿家家讀如姑翁俯視兒輩
弄豚雛浪擲朱顏付萍梗買絲自繡鳩盤茶披圖相向
照肝膽掩卷良久捫頭顱毋俾鬚眉畏明鏡扁舟一櫂
家鏡湖

懷鞏縣子騫袁十

長安席帽數前遊第一鋒車發汴州倚馬三年新令尹
提封百里古諸侯遙傳羽檄聞花縣卻憶珂鄉傍酒樓
袁氏弟姪多寓任城未許人閒還臥雪使君親製洛陽裘

自攜琴劍逐名場，愁絕關山雁影涼。
漸見苔岑搖宰樹，陳小圃太守孫萊湖太史丁煦洲
大令時皆同客京華今先後下世獨留萍梗度滄桑。
別時風雨尊前酒，亂後年華鬢上霜。
報道故人餐飯健，南柯餘夢裏戎裝。

病起口占

梅花落盡水僂老，烏銀炭息紅鑪早。
閉門旬日歐心肝，東風偷綠庭前草。

再遊玉露菴

雪泥鴻爪踏金沙，舊約依稀負菊花。
去秋有看菊之約不果幾日東風吹佛地，香臺紅簇牡丹芽。

乍住靈巖鐘磬聲，忽聞車馬到門驚。
門前細柳無心綠，

不許閒雲管送迎

時曾節相
移營駐此

海棠

橫陳錦帳昵風光
血點嚙猩樹幾行
一夜妝成偏欲睡
十分紅處可無香
別離有恨燒銀燭
護惜多情上綠章
祇恐煙愁還雨泣
陰晴春色費商量

病後再得一首

春至偏逢老病侵
陌頭風日半晴陰
草根隔歲抽寒碧
柳葉瞞人擢嫩金
蠹簡尙添新識字
錦囊猶有未嘔心
閒中打算消愁法
坐對盆花翦燭吟

復初禪室

春在盆花月在門
諸天鐘磬淨聞根
曇雲鉢現新詩句

卅字煙消破衲痕自有眞香餘草木最難清氣得乾坤
洗塵合共維摩住風雨登樓酒一尊

寄古豐大令雙肖竹同年

賦

門外甘棠一樹花危城如斗壓寒笳無心眠起三春柳

雙君曾罷
官復仕

著意官私兩部蛙豈有模稜成利器卻因蹉

齧識拳駒

雙好
直言

折腰何必非陶令先向公庭學種瓜

來書

有告
退意

浪逐名場耐一官半生肝膽照人寒目無破甑忘憂樂
心有長鞭策治安避亂十年曾學劍擁書千卷又彈冠
紅塵似海誰知己與子同袍結古歡

白海棠

海棠未開時紅如猩血
開極漸淡有清白者

一分紅褪錦難愁雨後煙銷二月秋舞到霓裳春睡足
燒殘銀燭豔妝羞倦扶玉樹歸金屋聘約梅花共白頭
省識前身原寂寞棠梨僊館夢雲浮

夜坐口占

暮色下平蕪春風起木杪柳搖沙水明月裏花陰小獨
犬號疏鐘羣蛙鼓寒潦疲驢何健鳴栖鳥出林早
登樓獨不寐天半聞城笳紙帳穴飢鼠殘更唳老鴉墨
痕濃似酒燈影嬾於花明朝修禊日敲枕易思家

懷趙桐生吳伯良寄鄆城行間

驅馬出門去初日升東關但恐強敵走不知行路艱儒
將重書生載筆隨征鑣勒石銘燕然所貴有馬班車行

若流水突過箐叢閒
蟲沙新戰骨風雨古梁山
昨夜捷書至月挂天弧彎

望氣登瑯樓暮色蒼然老
大河天際橫不得度飛鳥火
牛奪壘門城狐喪夙飽雷
霆鳴四山落葉一時掃露布
餘刀腥作者吳與趙倚馬
催千言燈紅檄初草縣腰
三尺龍臨風吐襟抱

木筆花

抽毫似雪傷書檠香惹金
壺墨汁傾萬綠叢中初脫穎
百花頭上自題名朝天有字
凌雲健入夢多情蘸雨輕
省識柳條新睡起一枝開
向畫眉聲

題江小梅所藏朱臥雲先生遺札

六台人

秋曹朱臥雲先生

麟祺

殉難舒城之十二年高弟子

江小梅

肇麟

收裝遺札見示始知先生以養心爲養

生徧讀丹經祇在懲忿窒欲使本心之明一無愧怍
並目道其效覺此心潛定不爲境搖從事武功身輕
體壯嗚呼先生之節義先生之學養也向嘗留意於
此猶自覺知明而不能守定當用力於克己二字讀
先生書益知不逮矣敬題長句歸之

志士養生先養氣孔曰成仁孟取義世人多慾焉得剛
猝然况履存亡地臥雲朱子傳薪傳讀書義不避神仙
覩破丹經事懲窒天君健在心骨堅五藏照見眞水火
獨與正氣相周旋

札內有云火性炎上懲忿則逆而下
伏水性就下窒慾則轉而上運水火

既濟陰陽相交造化在手靈根志行凝成自不覺一空

永固矣要祇在一心之自主耳

繫戀扶文弱讀書到此雄萬夫大義凜然頡山嶽十年

面壁一臨危臨危負生平學龍舒戰血濺孤城

咸豐癸丑

先生奉命在籍團練十月二十八日自天許神僊壽

六合援舒城力戰死之事聞得邀優卹

令名報國祇因心不死歸元何止面如生丈夫作事

期千載留得身名鎮滄海記取先生衣帶銘談玄尺素

遺書在傳之其人什襲藏霜天片羽存吉光令我披讀

淚浪浪服膺斯語毋相忘

寄錢穗生都門

鑑湖春色盪鵑波

時穗生自越入都

海岱行雲尚枕戈萬里人

言慈母健隔年書滯故鄉多壯遊心事輸長劍遷謫光

陰逼短鞵喜聽長安添老友重看楊柳拂靈和

海上迢迢舊夢痕吟詩不斷是愁根整冠空向旁人笑
對鏡誰知故我存錦字挑成重作繭碧筠抽老況生孫
登樓幾度獨搔首太白當年有酒尊

征袍花雨爛如銀珍重名場百劫身抵死無緣諳世故
讀書有分趁家貧甘心作嫁還求仕轉手爲文肯避人
拌得天涯知己少也應負弩逐紅塵

猛雨

朦朧睡方半猛雨撲危樓腳底黑雲立天風吹上頭颯
然窗榻開來自南山幽嫩雷傍地走一陣添颼颼綺疏
淨如洗屋宇爲清秋如龍出自峽如鷹脫於韝文章起

突兀大氣所湧流

贈江小梅

萬里重尋海岱遊十年名早壓風流
情原有種人先老詩到無題月替愁
字裏雪泥留指爪筆端花夢本箕裘
羈官寫意閒消受一卷傳經待校讎

短衣曾著祖生鞭三尺防身亦偶然
縛得塵纓仍網外

生來玉樹尙階前花殘別墅懷人句

時方遊李氏園林

草綠平

原相馬天底事相逢在行路登樓宜問謫神僊

春暮登太白樓

曠古詩才此舊遊近天風雨一層秋
故鄉辜負看山約扶得斜陽又上樓

下界開殘二月花南湖春色酒僊家一回登眺一搔首
獨樹城頭曉暮鴉

題江小梅昨非菴印譜

古人有筆皆如鐵健者鋒芒同斧鑕後來破觚乃爲圓
心骨絲輒求毫端書中三昧歸義獻師承尙苦簪花豔
文章妝樣偏入時中山兔貴昆刀賤殺青點漆還不磨
著書爭厭汗牛馱石鼓埋礪斯邈死世上人情重一紙
祇道江郎筆似花筆花怒扶泥金紫指上霜雕瑟瑟秋
高懸玉筍鉤銀鉤眾堅應手成文理大力運古摧琳鏐
以君斯筆載檣杪魅罔現形不得脫以君斯筆壽貞珉
廉隅砥礪無屈伸叵耐風流吐蓮鐸五丁小試開山鑿

向誰肝膽老 麗官雪鴻泥印從天落 讀君斯譜囊中錐

李唐以後文字卑 海岱浮雲蔽孤嶂 嶧山明日捫秦碑

李斯嶧山碑摹刻兗州署少陵詩所謂孤嶂秦碑在是也

宿獲麟莊在長溝

極目煙波動客愁 如山隄捍束行舟 長溝自昔臨南旺

漕河穿南旺元時已然大汶於今有北流 戴村三壩洩汶水北流起

明永樂間修復故道 老人十畝蘆田梅子雨 半湖秧水麥天秋 蜀山湖半成水田 麒

麟曠古無人識 舊事蒼茫問石樓 石樓村在莊北十里

過通濟橋至安居

下插輕舟勝一雙 夜流新沒繫船椿 長隄陡劃鴻溝土

時方築堤塹 箕水齊迎大帥幢 揆帥巡河 十里荒莊驚信馬 五更

刁斗怒村尨老農畚鍤休辭苦卜得安居是此方

安居晚眺

長亭短堠大隄行一望蘼蕪野色平
乳燕窺檐新學語老鴉登屋自呼名
湖心淺溜停微雨樓角斜暉漾嫩晴
光景依稀如鑑曲水田蕤笠有人耕

雨雹

一雨復再雨麥天終日秋炎暘漏當午
餘滴縣高樓東風起海岱行雲團四周
鼓腹鳴豐隆天路開驂騑早知六月冰
猶結瀚海頭何圖入煦沫唾作琳琅球
食古脫不化其大或如牛將以示夏蟲
寒暑紛矯揉半空露鱗爪造物與龍謀
絕大一吹息風雲扶輪軸銀河忽倒瀉

天地爲沈浮釀成梅子酸打起梨花愁變態易消歇桑
林呼鈍鳩斜陽有餘溼返照東山幽下視涵洞水漕河
洩水

處曰涵洞一尺湖心流

題拳石山房詩壁

長沙王生耆山初以從軍授都司折節讀書復補弟

子員飢驅四方不得志遊關東爲哨長

當古百
夫長

今年

四月來濟自効出其詩所志不凡爲題長句

第一騷人沈汨羅衡山風雨洞庭波長沙作賦還自弔
湘雲愁絕岷峨附茫茫大劫逼人來整頓乾坤楚有才
中峯喬木支大厦培塿松柏無凡材賣漿屠狗成奇傑
布衣那不思投筆耆山王子生其閒匡時有志塞胸臆

學劍知難敵萬人橫腰三尺且防身委心祇合作裨將
餘力未敢荒斯文還山重理寒窗課脫甲辭官返儒幙
亂後觀書膽識癡愁來下筆胸襟大文場一戰子衿青
馬上頭銜敝屣輕宛轉儒冠甘折節摩挲金錯餘豪情
丈夫殺賊尋常事冒向窮檐老文字何妨骨相不封侯
賦詩也見生平志迢迢遼海荷戈遊萬里漂零塞上秋
如此麤官偏識字感時贏得一絨愁任城拓戟來造請
同在天涯泛萍梗可憐得句必驚人我賦江南子歌郢
讀君詩罷雨滂沱太白樓前橫大河楚材楚用滿天下
數奇吾柰騷人何

贈海上葛君子材同客任城軍次

大風至今使人噫海水滔天兮山可移山可移兮人勿

移誰當海上經人師經人師繫可思中流砥柱其在斯

十年先識亂將至千金不受他族私

君之先子恪庭先生居滬上獨痛族

夷人曾卻法國千金之聘辭義學長

五十功名殊寫意一編白首欲何之

先生舉王子孝廉遂閉戶著書

杞憂到死不得釋中年况已親亂離論

著千篇關運會文章與世爲防維其閒學養具根柢首

重行誼厲丰姿傳之其人乃哲嗣潛心操筆無浮詞父

書琅琅已可讀矧披萬卷耽研思洞明世事本家學諷

議不避當官嗤揚雄口吃多著書曾固能文不在詩天

生人才輒多故讀書種子良數奇挾策談兵豈得已姓

名空使侯門知毅然投筆渡溟渤驚濤夜擁千熊貔急

裝草草裏琴劍天風吹面揚旌旗海外昂頭見嶽頂萬
里走看風雲奇書生何必不殺賊儒冠恇怯旁人疑短
衣磅礴亦壯事從人徑取生馬騎懷中猶有未上書一
濡盾墨空藩籬世上塵纓易束縛斯才莽莽宜不羈惜
我南中遲識面乍參戎幄同搢頤老至無聞畏後生卽
君世德吾師資方今將星臨魯野中原指日容恬嬉海
隅風浪儼不惡故鄉山水當可期勉承堂構拔靡俗手
驅罔兩無支祁吾亦從子而歸爾認取淞江一櫂清漣
漪

是歲夏方五予左乳漸生疽醫者僉謂怒所鬱
致此夫子則何敢怒哉詩以自懺

上士仁恕怒不生太和長養百體平下士恣睢必如意
怒有所之不爲癘中材喜怒殊分明物不得其平則鳴
物不得其平不鳴乃令礪礪縱橫生借取酒杯澆不破
空中聲色無形大心肝吐出旋復吞我有洞胸穿脅之
愁痕抑塞磊落其痛可捫痛可捫忍勿割纍纍墳起心
如結未能捨此熱血熱其閒格格儻有物君不見長松
偃蹇生癭瘤老龍怒抉霜天秋細草隨風枉生活芊緜
不解王孫憂

散步偕小梅十洲

萍蹤隨處泊浮鷗祇覺名山是舊遊好友乍逢三日別
新詩能了十年愁催歸有字通鄉信療病無方上酒樓

匹練吳門宜望遠御河經此已南流

月夜登太白樓別錢立吾

雨間何物至大剛黃河之水流洪荒扶輿蓬勃負盛氣
秦山之雲薄天際仰承斯理生斯人便與山嶽論精神
甯爲祥麟抵物角端肉不爲巨螯擁劍無腸腹遙遙吾
里射潮錢照人肝膽傳後賢炙手騰騰可憐熱粗官小
試當英年混沌聰明不在鑿書味填胸已不薄盤空痠
硬搏風雲行天之龍爪鱗作圖南苦復見滄海雨河轉
戰王師在三寸毛錐足斧柯書生上馬戎裝改曾仕江
郎帥投戈仰視東山高畢竟風前柳折腰爲山鯢鵬小
勤捻左令有六月息掉頭重草燈前檄今從事十年識面遲江南

鼎軍

隕然我忽生蒼髯挹君勁爽一軒舞雄談傲睨忘狂慙
天風浪浪吹人影一瞥東西又馳騁借此神僊舊酒樓
話我天涯老萍梗朦朧夜月漲孤城南湖淺碧荷花生
明朝送子鋒車去我獨歸帆千里行

時錢方隨大軍移紮魚臺

軍次南旋留別趙桐生鍾蘅塘江小梅諸同人
東山期成及瓜期又是天涯送客時戰馬嘶風君去速
飛鴻踏雪我行遲每因好友同愁病轉覺他鄉重別離
雙櫂南湖新菡萏懷人那得不吟詩

獨上扁舟便放歌光陰長夏費消磨神僊餞別樓常在
兒女催歸信苦多燈火有情千里共江天無際片雲過
重逢莫道秋風遠開到黃花一剎那

補勤詩存卷之十一